

欽定大清會典事例

欽定大清會典事例卷一百五十七

戶部

戶口 編審 清釐丁役 口賦 丁銀 摻徵

編審○順治五年題准三年一次編審天下戶口。責成州縣印官照舊例攢造黃冊。以百有十戶為里。推丁多者十人為長。餘百戶為十甲。城中曰坊。近城曰廂。在鄉曰里。各設以長。每遇造冊時。令人戶自將本戶人丁。依式開寫。付該管甲長。該管甲長將本戶並十戶造冊送坊廂里各長。坊廂里各長將甲長所造文冊。攢造送本

州縣該州縣官將冊比照先次原冊攢造類冊。用印解送本府。該府依定式別造總冊一本。書名畫字。用印申解本省布政使司。造冊時。民年六十歲以上者開除。十六歲以上者增註。○十一年覆准。每三年編審之期逐里逐甲。查審均平。詳載原額新增開除實在四極。每名徵銀若干。造冊報部。如有隱匿捏報。依律治罪。○十三年覆准。五年編審一次。○十四年定。州縣官編審戶口。增丁至二千名以上。各予紀錄。○十五年議准。各省編審人丁。五年一次。造冊具題。於

編審次年八月內到部。如不照限題報者。經管官照違限例議處。府州縣編審年分借名造冊科派者。從重治罪。督撫不行參究。一併議處。○

康熙二年定。州縣增丁二千名以上者。督撫布政司及道府俱准紀錄。○十一年覆准直省編審。概令繕疏具題。○二十五年定。編審原限一年八箇月。限期過寬。嗣後限一年歲底造報。州縣將新增之丁。隱匿不報者。照例參處。○六年覆准編審缺額人丁。令該撫陸續招徠。於下次編審補足。○五十一年

諭朕覽各省督撫奏編審人丁數目。並未將加增之數。盡行開報。今海宇承平已久。戶口日繁。若按現在人丁加徵錢糧。實有不可。人丁雖增。地畝並未加廣。應令直省督撫將現今錢糧冊內有名丁數。毋增毋減。永為定額。嗣後所生人丁。不必徵收錢糧。編審時止將增出實數。察明另造冊題報。朕凡巡幸地方。所至詢問一戶。或有五六人。止一人交納錢糧。或有九丁十丁。亦止一二人文納錢糧。詰以餘丁何事。咸云蒙皇上宏恩。並無差徭。共享安樂。優游閒居而已。此朕之訪聞甚晰者。前雲南貴州廣西四川等省。遭叛逆。

之變。地方殘壞。田畝拋荒。自平定以來。人民漸增。開墾無遺。山谷崎嶇之地。已無棄土。由此觀之。民之生齒實繁。朕故欲知人丁之實數。不在加徵錢糧也。今國帑充裕。屢歲蠲免。輒至千萬。而國用所需。並無不足之虞。故將現徵錢糧冊內有名人丁。永為定數。嗣後所生人丁。免其加增錢糧。但將實數造冊具報。豈特有益於民。亦一盛事也。直隸各省督撫及有司。自編審人丁時。不將所生實數開明具報者。特恐加徵錢糧是以隱匿。不據實奏聞。豈知朕並不為加賦。止欲知其實數耳。○五十二年

恩詔嗣後編審增益人丁止將滋生實數奏聞其徵收  
辦糧但據五十年丁冊定為常額續生人丁永不加  
賦○五十五年覆准新增人丁欽奉

恩旨永不加賦令以新增人丁補足舊缺額數除向係  
照地派丁外其按人派丁者如一戶之內開除  
一丁新增一丁即以所增抵補所除儻開除二  
三丁本戶抵補不足即以親族之丁多者抵補  
又不足即以同甲同圖之糧多者頂補其餘人  
丁歸入滋生冊內造報○五十六年題准續增  
人丁既不加賦將增丁之州縣官員議敘停止

○又題准如有州縣將滋生人丁私行科派者。  
該督撫即行題參。乾隆元年議准滋生戶口。  
每逢五年務須據實造報實力奉行不得視為  
具文脫戶漏口。五年議定直省督撫於每歲  
十一月將各府州縣戶口增減繕寫黃冊具奏。  
仍將奏明數目報部察覈稟奏。又題准造報  
民數每歲舉行為時既近而自通都大邑以及  
窮鄉僻壤戶口殷繁若每年皆照編審造報誠  
恐紛煩滋擾直省各州縣設立保甲門牌土著  
流寓一切臚列原有冊籍可稽若除去流寓將

土著造報即可得其數。且令該督撫於每年仲冬將戶口實數與穀數一併造報以免紛擾。至番疆苗界向來不入編審不必造報。○十一年諭向來江西省每逢編審之年丁男之外又有婦女蓋緣從前有鹽鈔一項分給小戶計口納鈔既有婦女應徵之項則不得不稽其存亡增減是以入於編審之內也。今食鹽課鈔久經攤入地糧而該省尚循舊例辦理朕想從前照鹽納價編審尚屬有名今鹽鈔既已攤入地糧之內則是婦女已無可徵之項何必存此編審虛名徒滋擾累嗣後編審婦女著停止。○

三十二年議准發遣烏魯木齊人犯原犯死罪減等發遣者作為五年原犯軍流改發及種地當差者作為三年准入民籍將伊等安插昌吉沙東舊堡指給地畝耕種納糧○三十七年

諭編審人丁舊例原因生齒繁滋恐有漏戶遊差之弊是以每屆五年查編造冊以備考覈今丁銀既皆攤入地糧而滋生人戶又欽遵康熙五十二年

皇祖恩旨永不加賦則五年編審不過沿襲虛文無裨實政況各省民穀細數俱經該督撫於年底專摺奏報戶部覈實具奏付之史館紀載是戶口之歲增繁

盛俱可按籍而稽更無籍五年一次另行查辦嗣後編審之例著永行停止○又議准四川各府廳州縣土司新舊人丁並流寓戶口照例歸入地畝項下按額造地丁奏銷冊內題報查覈○四十年諭直省滋生戶口向惟冊報戶部朕臨御之初即飭各督撫歲計一省戶口倉穀實數於仲冬具摺以聞並繕冊由部臣彙覈以進蓋仿周禮司民掌登民數拜獻於王之意即藉以驗海宇富庶豐盈景象法至善也顧行之日久有司視為具文大吏亦忽不加察穀數尚有倉儲可覈而民數則量為加增所報之摺及

冊竟有不及實數什之二三者。其何以體朕周知天下民生本計之心乎。我國家累洽重熙百三十餘年於茲休養蕃滋盛於往牒且我

皇祖恩旨以生齒日繁人民永不加賦其利甚溥閭閻安享昇平樂利阜寧歲計倍有增益詎可不確畧以登記盛世殷繁之實乎現今直省通查保甲所在戶口人數俱稽考成編無難按籍而計嗣後各督撫飭所屬具實在民數上之督撫督撫稟摺上之於朝朕以時披覽既可悉億兆阜成之概而直省編查保甲之盡心與否即於此可察焉其敬體而力行之毋忽

○又

諭從前厯辦民數冊。如應城一縣。每歲止報滋生八口。應山棗陽止報二十餘口。及五六七口。歲歲滋生。數目一律雷同。各省歲報民數。用以驗盛世閭閻繁庶之徵。自當按年確覈。豈有一縣之大。每歲僅報滋生數口之理。可見地方有司。向竟視為具文。而厯任督撫亦任其隨意填造。不復加察。似此率略相沿。成何事體。前曾降旨。令各督撫將實在民數通報上陳。但恐督撫等泥於歲底奏報之期。尚不免草率從事。仍屬有名無實。所有本年各省應進名冊。均著展至明

年年底繕進俾得從容確覈以期得實嗣後每年奏報民數各督撫務率屬實力奉行毋再如前約略開遠。儻仍因循疏漏查出定當予以處分若各督撫查辦民數既不實心遇有偏災辦賑復從而遷就迴護致窮黎不能普霑實惠一經訪聞惟該督撫是問

清釐丁役○順治四年題准編審人丁凡年老殘疾並逃亡絕戶悉行豁免○十三年議准江南通計州縣田地總額與里甲之數均分辦糧當差豪戶不得多占隱役苦累小民其推收編審悉照均田均役聽民自相配搭○又覆准屯

丁納銀准免民田重科。○康熙五年覆准廣西  
西隆州西林縣改歸內地停其編丁。○二十八  
年覆准四川松建等衛所免其編審。○三十五  
年覆准雲南兵丁除本身外其兄弟親族等餘  
丁悉令清出編入丁數輸稅。三十六年覆准  
四川新設會理州免其編審。○四十年覆准四  
川東川府僻處極邊難與腹裏州縣一例編丁  
應停其編審雍正四年改  
詔雲南省。○五十三年覆准甘  
肅實在無業窮民編入丁冊免其編丁。○五十  
五年議准買賣地畝其丁銀有隨地起者即隨

地徵丁。儻有地賣丁留與受同罪。○雍正四年  
覆准免雲南太和鄧川等州縣土軍丁銀。○六  
年覆准河東鹽池渠堰歲修大修既存動支之  
費其鹽丁民夫永裁將丁夫編入民籍與民一  
例差役。○七年議准廣西甯明東蘭二州以土  
改流免其編審。○九年覆准停止廣西歸順州  
編審。○十一年覆准滇省緬甯地方改土歸流  
停其編入丁冊。○乾隆三十七年奏准各省民  
丁五年編審之例奉

旨永行停止所有尙不歸運軍丁一體停其編審外其

各省運漕軍丁。按四年編審一次。糧道清查造冊。送總漕覈題。至江南所屬江淮興武二衛黃快丁。湖廣所屬岳州荆左。沔陽三衛操軍。係續經奏明歸還自應與運丁一律編查。○四一年議准江南徐州衛有歸併楚軍原係楚省護軍回籍。今於江夏武昌嘉魚咸甯蒲圻崇陽通城興國大冶通山漢陽漢川沔陽黃岡麻城京山等十六州縣共清出徐州衛什軍七百七戶俟編審之年。徐州衛詳委千總一員赴楚會同編審造冊。如各軍所住村落未滿百戶附入民

戶編查。其民戶雜差。仍一體寬免。○又議准蘇州等衛軍丁冒填民籍。捐納中式。各官主查。取改籍供結。造冊咨部更正。嗣後於四年編審冊內姓名之下。註明捐納中式字樣。不許竄入民籍。庶軍丁不致脫漏。而軍民兩清。○五十四年議准各省編查軍丁。僅止清查軍民產業未實者。仍照原例議處。儻有故縱殷富軍丁竄入民籍。並將田產代為隱匿脫漏者。即將原查之該管州縣衛所官弁立時叅革。發往新疆效力贖罪。永不敘用。夫察之糧道知府。一併革職營謀。

脫漏之本丁。發往黑龍江給兵丁為奴。該丁之弟兄子孫仍編入軍籍。○道光六年

諭那彥成奏請查革挂名吏役一摺所奏是向來各直省大小衙門書吏差役及門斗弓兵均有定數不容增添。惟直隸差務較繁。准招散役數名。例無官給工食。免其差役。乃今日冒濫漸多。訛詐欺壓擾害鄉閭重滋流弊。自應嚴定章程以示限制。著照所請嗣後司道府廳衙門吏役不准過五十名。由本官酌定名數造立卯簿。州縣衙門吏役不准過八十名。教官佐雜衙門門斗弓兵不准過二十名。由該管道府酌定。

名數。造立循環卯簿。年終報明該管道府具報總督衙門查點餘皆一概革退編入里甲當差。仍將入卯之役。彙造總冊立案。每名止准免地三十畝。以杜包庇影射。該督務飭屬隨時認真查察。實力奉行。毋得日久視為具文。

口賦○直隸布政使司所屬人丁。每口三分至二兩六錢有差。民丁屯丁稅共四十二萬四千四百四十四兩一錢九分八釐。遇閏加徵一萬六千二百八十兩九錢四分二釐五毫○奉天府尹所屬人丁。每口一錢五分至二錢有差。遇

閏不加徵。○山東布政使司所屬人丁。每丁科銀二錢至三錢五分零不等。民屯丁稅共三十四萬七千四百四十九兩八錢八分有奇。遇閏加入地畝內徵解。竈丁稅六千六百三兩六錢三分三釐有奇。○山西布政使司所屬人丁。每口一錢至四兩五分三釐零有差。更名各藩所占之田歸民墾種曰屯丁。明初以代更名。因有更名下後同。每口一錢至三錢零有差。共銀五十六萬三千七百十三兩九錢九分。地差銀七萬八千二百九十三兩二錢各有奇。遇閏不加徵。○河南布政使司所屬

人丁。每口一兩至二錢零有差。收併衛所每口  
二分至一兩五錢有差。共民丁稅十有一萬三  
千一百六十兩五錢七分六釐。衛所丁稅六千  
九百四十八兩七錢六分。更名寄莊寄糧丁稅  
一百五十四兩四錢四分八釐各有奇。遇閏不  
加徵。○江南江蘇布政使司所屬人丁。每口一  
分四釐至一錢零有差。別有科錢五文者共民  
丁稅二十三萬九千五百四十六兩九錢六分  
三釐有奇。遇閏加徵一千八百二十七兩二錢  
六分一釐有奇。軍丁稅一萬一千二百二十四

兩五錢九分七釐有奇。遇閏不加徵。○安徽布政使司所屬人丁。每口五分至五錢一分九釐零有差。鹽鈔每口銀七釐四毫。共民丁稅二十萬七千八百七十六兩八錢七分有奇。遇閏不加徵。衛所丁稅一萬二千五百七十二兩三分有奇。遇閏不加徵。屯丁稅二十六兩六錢九分二釐二毫。遇閏加徵二錢二分六釐。寄莊丁稅八兩九錢六分一釐。遇閏不加徵。匠班丁稅三千八百七十兩三錢有奇。遇閏加徵三錢三分七釐五毫。○江西布政使司所屬人丁。每口三

分二釐零至一兩三錢四分六釐零有差。鹽鈔  
小口。每口二釐六毫至九釐五毫零有差。共民  
丁稅一十八萬三千六百七十五兩有奇。遇閏  
加徵一千八百五十五兩有奇。屯丁稅一千三  
百二十六兩。遇閏加徵二十三兩各有奇。○福  
建布政使司所屬人丁。每口八分三釐九毫零  
至二錢九分一釐有差。鹽鈔小口。每口一分四  
釐七毫至一分八釐一毫有差。共民丁稅一十  
七萬五千有七十五兩四分四釐七毫。屯丁稅  
五千四百二十四兩七錢六分五釐五毫各有

奇。遇閏不加徵。○浙江布政使司所屬人丁。每口一釐至五錢七分二釐零有差。別科米二合二勺至三升三合有差。共民丁稅。二十三萬六千九百九十一兩七分有奇。遇閏不加徵。屯丁稅五百二十七兩六錢二分三釐。遇閏不加徵。○湖廣湖北布政使司所屬人丁。每口一錢五分四釐零至六錢四分三釐八毫零有差。共民屯丁稅。十萬九千九百九十九兩五錢四分有奇。遇閏不加徵。湖南布政使司所屬人丁。每口三分零至八錢三分五釐零有差。共民屯丁稅。

七萬七千三十六兩四釐有奇。遇閏不加徵○  
陝西布政使司所屬人丁。每口一錢。共民屯丁  
稅二十四萬三百一十三兩一錢五分有奇。遇  
閏加徵八千七百二十七兩八錢三分有奇○  
甘肅布政使司所屬人丁。每口二錢。共民屯丁  
稅六萬一千九百有四兩三錢三分有奇。分河  
東河西河東遇閏加徵二千四百三十三兩七  
錢四分有奇。河西遇閏不加徵○四川布政使  
司所屬人丁。每口一錢二分至五錢一分零有  
差。共丁稅五萬六千九百九十一兩八錢二分

一釐四毫有奇。○廣東布政使司所屬人丁。每口一釐九毫零至一兩三錢二分六釐零有差。共民丁屯丁黎丁稅。一十二萬三兩七錢九分有奇。遇閏加徵五千五百一十八兩四錢七分九釐有奇。○廣西布政使司所屬人丁。每口一錢五分至四錢五分二釐零有差。共民屯丁稅四萬六千三百三兩一錢有奇。遇閏加徵三百二十四兩二錢。○雲南布政使司所屬人丁。每口三分至五錢五分有差。共民站丁土步軍丁魚戶丁稅。二萬九千三百三十九兩一錢二分。

六釐。威遠三園蠻令等村丁銀三十二兩。貴州  
威甯州撥歸宣威州。丁銀三十四兩八錢。遇閏  
不加徵。○貴州布政使司所屬人丁。每口一錢  
五分零至四兩零有差。共民丁夷丁稅一萬三  
千七百八十一兩一錢二分有奇。遇閏加徵六  
百六十三兩四錢三分有奇。

丁銀攤徵。○康熙十一年覆准浙江所屬食鹽  
鈔銀均攤入地丁內徵收。○三十六年覆准浙  
江匠班銀七千四百九十兩有奇。均攤於通省  
地丁下帶辦。○三十九年覆准湖北匠班銀照

浙江之例歸入地丁徵收。○四十一年覆准山東匠班銀歸入地丁徵收。○五十五年議准廣西所屬丁銀就各州縣地畝分攤每地賦銀一兩均攤丁銀一錢六釐四毫有奇。○雍正元年覆准直隸所屬丁銀均攤地糧之內徵收每地賦銀一兩合攤丁銀二錢七釐有奇。○二年覆准福建所屬丁銀就各州縣地畝分攤每地賦銀一兩合攤丁銀五分二釐七毫至三錢一分二釐零有奇。屯地每兩徵丁銀八釐三毫至一錢四分四釐八毫零有奇。○三年覆准山東所

屬州縣衛所各項丁銀皆攤入地畝內徵收。每  
地賦銀一兩合攤丁銀一錢一分五釐。○四年  
覆准河南所屬丁銀攤入地畝徵收。每地賦銀  
一兩合攤丁銀一分一釐七毫六絲至二錢七  
釐二絲零不等。○又覆准浙江各屬丁銀以通  
省之田畝均攤每田賦銀一兩均攤丁銀二錢  
四釐五毫有奇。○又題准陝西西安所屬民屯  
更名地等丁攤入地糧徵收。每地賦銀一兩合  
攤丁銀一錢五分三釐。遇閏每銀一兩合攤丁  
銀一錢五分七釐有奇。○又題准甘肅所屬有

民屯更名監牧等丁。河東地糧輕而丁多。河西  
地糧重而丁少。不能通省一例攤派。河東每銀  
一兩。攤丁銀一錢五分九釐三毫有奇。遇閏每  
銀一兩加徵銀一錢七分四釐八毫。河西每銀  
一兩。攤丁銀一分六毫有奇。遇閏不加徵。○又  
題准四川所屬丁銀向係以糧載丁徵收。經年  
已久。惟威州等十一州縣。係丁地分催。自五年  
為始。亦令以糧載丁。每糧五升二合至一石九  
斗六合零不等。算人丁一丁徵收。○又覆准雲  
南丁銀攤入地畝徵收。○五年題准江南江蘇

所屬丁銀在於各屬田地項下攤徵。省衛外衛  
丁銀在於各屬屯衛田地項下攤徵。安徽所屬  
丁銀在於各屬田地內攤徵。各衛所屯丁在於  
各屬屯衛田地內攤徵。均每畝攤徵丁銀一釐  
一毫至六分二釐九毫零不等。又婺源縣寄莊  
八丁並匠班銀均在田地內按畝攤徵。○又覆  
准江西所屬丁銀攤入地畝屯糧內完納。每地  
賦銀一兩合攤徵丁銀一錢五釐六毫。屯地每  
兩徵丁銀二分九釐一毫有奇。○六年題准長  
蘆利民等八場竈丁銀攤入各場竈地徵收。每

畝徵銀六釐至一分不等。○又覆准奉天府所屬丁銀以入籍民人增除不定。仍照舊例丁地分徵。不攤入地畝。○又題准湖南民丁及更名田丁屯丁各歸各縣攤入田糧銀內徵收。每地賦糧一石。合攤丁銀一毫四絲至八錢六分一釐零不等。○又題准廣西所屬丁銀就各州縣地畝分攤。每地賦銀一兩。均攤丁銀一錢三分六釐零不等。○七年題准湖北各屬丁銀均勻攤入民賦。及更名田地條餉。每地賦銀一兩。合攤丁銀一錢二分九釐六毫有奇。惟江夏等十

九州縣內有重丁銀除抵減豁免外攤入地賦  
銀數多寡不等江夏縣民賦田及更名田每兩  
派徵丁銀一錢一分九釐七毫嘉魚縣民賦田  
每兩攤丁銀一錢二分九釐六毫更名田每兩  
派丁銀六分六釐漢陽縣民賦田每兩攤銀八  
分五釐六毫更民田每兩派銀五毫漢川縣民  
賦田每兩攤丁銀四分七釐更名田每兩派丁  
銀二分一釐三毫孝感縣民賦田每兩攤丁銀  
一錢二分九釐八毫更名田每兩派丁銀一錢  
一釐二毫蘄水縣民賦田及更名田每兩攤丁

銀八分二釐六毫。黃岡縣民賦田及更名田。每兩攤丁銀一錢一分八釐二毫。黃梅縣民賦田。及更名田。每兩攤丁銀一錢二分八釐一毫。廣濟縣民賦田。及更名田。每兩攤丁銀一錢二分三釐八毫。鍾祥縣民賦田。每兩攤丁銀一錢二分九釐六毫。更名田及屯田。每兩派丁銀六釐二毫。潛江縣民賦田。及更名田。每兩攤丁銀一錢二釐七毫。沔陽州民賦田。及更名田。每兩攤丁銀一錢二分九釐六毫。天門縣民賦田。每兩攤丁銀一錢二分九釐六毫。更名田。每兩攤丁

銀九釐九毫。荆門州民賦田及更名田。每兩攤丁銀一錢一分八釐八毫。江陵縣民賦田。每兩攤丁銀一錢二釐三毫。更名田。每兩攤丁銀三毫。石首縣民賦田及更名田。每兩攤丁銀一錢七釐一毫。監利縣民賦田及更名田。每兩攤丁銀七分八釐七毫。松滋縣民賦田。每兩攤丁銀一錢一分三釐九毫。更名田。每兩攤丁銀三釐二毫。棗陽縣民賦田。每兩攤丁銀九分五釐九毫。更名田。每兩攤丁銀九分五釐九毫零各有奇。其餘各屬皆照一錢二分九釐六毫零均攤。

乾隆二年題准山東永利等十場下賸一半竈  
戶丁銀全攤入各場竈地徵收每畝徵銀一分  
四釐有奇。十年覆准山西丁糧分辦貧民偏  
累尚多。丁銀攤入地畝有勢所難行者將太原  
等十八縣丁銀全數攤入地畝每糧一石合攤  
丁銀一分八釐至二錢二分二釐每地賦銀一  
兩合攤丁銀一錢四分七釐九毫至三錢三分  
八釐零不等。交城等十五縣丁銀一半攤入地  
畝甯鄉等二縣丁銀照下則徵收餘銀攤入地  
畝渾源等二州縣丁銀三分之一攤入地畝河

曲縣丁銀十分之一攤入地畝。吉州將無業苦  
丁攤入地畝變通攤徵其餘陽曲等二十四州  
縣或係貿易民多輸丁為易農民不願代納或  
係接山傍水地瘠民貧丁銀難於攤徵或係地  
臨邊隅田多沙鹹不便加徵地糧或係多徵本  
色丁徭最重額賦不能強同仍照前丁地分辦  
別有陽曲等八縣屯丁徭銀亦全數攤入屯地  
徵收○十二年題准福建臺灣府官莊田園共  
五十八萬三千三百七十八畝零每畝均丁銀  
四釐一毫零至八釐六毫不等共人丁銀三千

六百六十五兩四錢。自入田園徵收。至各番衆所耕田地概不完賦。止就丁納銀。仍照舊完納母庸攤入田畝。○二十三年覆准山西太谷臨縣石樓五臺崞縣等五縣丁徭全攤入地糧。永甯州以現在每丁額徵三錢。餘攤入地糧。朔州均照中下下下二則。按現在實丁與寄莊已久之戶。按地多地少分納。其衛丁按下上下中下下三則分別貧富均納。榆社縣以三分之一攤入地糧。沁州每丁概徵一錢。餘攤入地糧。沁源武鄉二縣以一半攤入地糧。靜樂縣以十分之

三攤入地糧代州以每丁概納一錢三分三釐。餘攤入地糧保德州將下下則丁徭按丁徵輸餘攤入地畝隰州永和二州縣將寄居年久有產之戶按丁輸納下下則徭銀原額重徭均勻減除○三十一年覆准山西交城縣之現徵民丁一半徭銀及屯丁徭銀文水縣之實徵丁銀及應徵徭稅河津縣之實徵丁銀稷山縣之土著與紳衿吏承優免丁三項及屯丁額徵徭銀俱令攤入地糧及屯租等項內完納隰州丁銀以十分之五歸入地糧大甯縣再減丁銀一千

兩。攤入地糧蒲縣丁銀均勻攤派改為下一下則徵收其餘仍令丁糧分辦。○四十二年覆准貴州通省丁銀一萬三千七百九十二兩三錢八分一釐內平越等三十六府廳州縣應徵丁銀九千三百六十七兩二錢八分二釐歷年隨糧完納應仍其舊貴陽等二十九府廳州縣共應徵丁銀四千四百二十五兩九分九釐按畝攤徵計各屬田地八十一萬二千八百六十九畝零每畝攤丁銀五釐四毫四絲三忽零○五十六年覆准山西省各州縣丁徭地糧向係分

款徵收嗣因無業窮丁。催輸匪易。節經先後查辦。或全行歸入地糧。或按分攤減辦理。其未經議歸之陽曲等二十六州縣。俱屬照舊分徵。今平陽府屬之曲沃縣。額徵丁徭及屯丁銀一萬四千一百二十兩零。全歸地糧併徵。又天鎮縣額徵丁銀一千五百三十五兩零。於該縣額徵地糧銀六千七百五十七兩七錢數內。全數攤徵。尖丁耗銀隨正輸納。其應徵本色米石。照舊徵收。朔州州衛額徵丁銀二千九百九十二兩七錢零。及隨丁徵納賓興銀三十兩。在於額徵。

地糧銀九千九百八十二兩三錢數內無分州  
衛一體攤徵。覈計科則分攤。每地一畝自一釐  
八釐至四分不等。再大同左雲等十四團操共  
徵丁銀三百二十六兩零。在於大同府屬之分  
駐豐鎮同知所管民牧地畝應徵銀三萬三千  
一百十一兩內酌攤計加攤銀每兩九釐。統於  
乾隆五十六年為始。全行改歸輸納。○五十八  
年議准山西大同縣額徵丁銀三千五百八十八  
兩一錢三分。額徵折色銀一萬五千七百二十  
兩四錢四分零。及隨丁應納賓興銀六十兩。

全歸地糧併徵。每糧銀一兩。應攤徵丁銀一錢。  
一分七釐零。懷仁縣額徵丁銀一千二百七十  
九兩九分。歸入地糧銀五千九百一兩三錢三  
分零數內徵收。每糧銀一兩。應攤徵丁銀二錢  
一分六釐零。懷仁縣額徵米丁銀二百七十二  
兩。歸入屯田地糧銀一千五百四十二兩一錢  
七分數內徵收。每糧銀一兩。應攤徵丁銀一錢  
七分六釐。又前衛額徵丁銀五十二兩三錢歸  
入屯田地糧銀二百二十兩四錢五分數內徵  
收。每糧銀一兩。應攤徵丁銀二錢二分六釐。至

該縣衙廳尖丁各有隨徵耗羨今丁銀全數歸入地糧其丁耗銀兩應按每糧銀一兩加摊丁銀之多寡照數隨徵○道光元年

諭山西通省州縣向來丁徭地糧分款徵收嗣因貧民輸納維艱節經奏准將丁徭銀兩歸地糧攤徵已有八十一州縣惟孟縣等二十州縣未經議改疊經縣民以苦累呈控現今戶部查明該省編丁已久若照原額催徵其一丁頂完一二十丁及逃亡故絕之戶勢難完納請循照成案將孟縣丁銀歸入地糧攤徵著交成格秉公查辦毋聽州縣官迴護蒙詳因恤民

瘼。○二年奏准山西省平定州孟縣二處丁徭銀兩。  
自本年起攤入地糧項下徵收。

欽定大清會典事例卷一百五十八

戶部

戶口

新墾升科分攤 保甲  
改正戶籍 番民歸化 流寓異地  
買賣人口 安集流民

新墾升科分攤。○雍正三年覆准。山東布政使司所屬州縣衙所各項丁銀。均攤入地糧內徵收。其開墾地畝。俟升科後。遇五年編審之期。合一縣丁銀。計新舊地銀。按糧攤減。各就一縣之地均算。○四年覆准。河南丁銀攤入地畝。嗣後遇有報墾升科。將丁銀隨年別行均攤。○十一

年議准。湖北於雍正七八九年各屬開墾田地。  
新升糧銀九千四百一兩四錢八分零。抵減漢  
陽等八縣重丁銀。又新升糧銀內應派丁銀一  
千二百十有八兩九錢有奇。先儘鍾祥一縣攤  
減其江夏等十一州縣並漢陽等八縣未經抵  
足重丁銀八千三百有八兩全行豁免。

保甲。○州縣城鄉十戶立一牌頭。十牌立一甲  
頭。十甲立一保長。戶給印牌一張。備書姓名丁  
數。出則註明所往。入則稽其所來。其客店亦令  
各立一簿。每夜宿客姓名人數行李牲口幾何。

作何生理。往來何處。逐一登記明白。至於寺觀亦分給印牌。備書僧道口數姓名。稽查出入。○雍正十一年覆准。福建臺屬村莊居人。流寓者多。除自立產業兼有父母妻子者。自有十家甲牌可稽。其並無家室產業。如佃戶。傭工。貿易之人。取具業主房主鄰佑保結。附於甲牌之末。彙報督撫稽查。如業主房主鄰佑保結匪人事發連坐。先首者免罪。○乾隆元年覆准。江西設立保甲。城鄉鎮集人煙稠密之所。按戶編查。至窮鄉僻壤。零星居住之民。一村一莊止數家者。難

於編設。令州縣官詳酌形勢。妥協辦理。毋任吏胥夤緣為姦。擾累戶民。其餘各省。均聽該督撫自行酌量辦理。○十一年覆准行令直省督撫轉飭所屬。將現行保甲門牌冊籍。實力稽查。其有倡為邪說。斂錢作會。以及往來無定行蹤可疑之輩。鄉保不得徇隱。地方官立時查究。○十二

二年題准。浙江玉環一山管轄島嶼。飭令該管文武官弁會同清釐界址。分立都圖。編排保甲。在農民人。分別是農是漁。果是耕種農民。准其居住。如係漁戶。不准混雜占住。○二十二年

諭

州縣編查保甲。本比閭什伍遺法。地方官果能實力奉行。不時留心稽查。民間戶口生計。人類良莠。平時舉可周知。惰游匪類。自無所容。外來姦宄。更無從託。迹於治理最為切要。乃日久生玩。有司每視為迂闊。常談。率以具文從事。各鄉保長甲長類。以市井無賴之徒充之。平時並不實心查察。雖督撫課最有力行。保甲之條。不過故套相沿。毫無裨益。嗣後務宜慎重遵行。不得仍前玩視。其如何設法編查。及考覈責成之處。著各該督撫各就地方情形。詳細具奏。欽此。遵旨議定。順天府五城所屬村莊。暨直省各州縣城市鄉

村。每戶由該地方官歲給門牌。書家長姓名生業。附註丁男名數。出註所往。入稽所來。有不遵照編挂者。治罪。十戶為牌。立牌長。十牌為甲。立甲長。十甲為保。立保長。限年更代。以均勞逸。士民公舉誠實識字及有身家者。報官點充。地方官不得派辦別差。以專責成。凡甲內有盜竊。邪教。賭博。窩逃。姦拐。私鑄。私銷。私鹽。驪麪。販賣硝黃。並私立名色。斂錢聚會等事。及面生可疑形迹。詭祕之徒。責令專司查報。戶口遷移登記。並責隨時報明。於門牌內改填換給。牌甲保各長。

果能稽查詳慎。首報得實。酌量獎賞。儻應查不  
查。應報不報。按律分別治罪。鄰省鄰縣差役。就  
持印票到境拘拏盜賊及逃犯。保甲長密同捕  
獲。免其失察之罪。若差役誣執平民。許保甲長  
赴本管官剖白。候奪僕係玩庇。按律究治。地方  
官奉行保甲。若虛文塞責。及濫任匪人。藉端滋  
擾者。題叅議處。○又議准紳衿之家。與齊民一  
體編列。聽保甲長稽查。違者照脫戶律治罪。地  
方官徇庇。照本例議處。凡僉充保甲長並輪直  
支更看柵等役。紳衿免充。齊民內老疾寡婦之

子孫未成丁者亦免充。兵丁書役與民戶同編。本身免充保甲長。○又議准聚族而居。丁口衆多者。擇族中有品望者一人。立為族正。該族良莠。責令查舉。○又議准旗民雜處村莊。一體編次。將旗分戶口。並所隸領催屯目。註明牌冊。旗民有犯。許互相舉首。地方官會同理事同知辦理。至各省駐防營內居住之商民。以及官員雇用之人役。均令另編牌冊。由同知查覈。○又議准蒙古地方種地民人。設立牌頭總甲。及十家長等。凡係竊匪逃人。責令查報。通同徇隱。一併

治罪。○又議准客民在地方開張貿易。置有產業者。與土著一例順編。至往來無定商賈。責令客長查察。凡客商投宿旅店。船埠寺廟。該店主埠頭住持詢明來歷。並將騎馱夥伴數目。及去來日期。逐一註明送官。若有疏縱。各治以罪。○又議准鹽場井竈。另編牌甲。所雇工人。隨竈戶填註。即令約束。責成場員督查。如容留匪類。竈戶照牌頭例治罪。場員參處。礦廠丁戶。責成廠員督率廠商。課長峒長鑪頭等編查。各處煤窯。責令雇主將傭工人等。冊報地方官查覈。如有

藏匿姦匪。分別查叅究處。○又議准各省山居棚民。按戶編冊。責成地主並保長結報。廣東省察民。每寮給牌。互相結報。責令寮長鈐束。僥窩藏姦宄。容隱不報。查出治罪。其業主招佃。及寮丁墾種官山。俱赴官報明查驗。方可搭寮耕種。違者。招佃之山主。照違令律治罪。墾種寮丁。照盜耕田畝律治罪。文武員弁叅處。○又議准苗猺寄籍內地。久經編入民甲者。照民人一例編查。其餘各處苗猺。責令千百戶及頭人峒長。稽查約束。儻有生事犯法。不行舉報。分別定罪。○

又議准。雲南省夷人與民錯處者。一體編入保甲。其倚山傍水自成村落。及懸崖密箐內搭寮居處者。責令管事頭目造冊稽查。如有窩藏漢姦。即時稟報。扶同徇隱。查出究革。○又議准。外省入川民人。同土著一律編查。係依親佃種者。即附田主戶內。儻有不安本分。及來歷不明者。報官究處。○又議准。甘肅省番地戶民。責成土司稽查。係地方官管轄者。令該管頭目編查。地方官給牌。另冊造報。其四川省改土歸流各番寨。責成鄉約甲長稽查。仍均聽撫夷掌堡管束。

○又議准寺觀僧道責令僧綱道紀按季冊報  
凡有游方僧道形迹可疑及為匪不法者稟官  
查逐若混留滋事住持治罪僧道官革究其各  
省回民責令禮拜寺掌教稽查約束有出外為  
匪者將掌教之人一併治罪○又議准外來流  
丐保正督率丐頭稽查少壯者詢明籍貫稟官  
遞回原籍安插其餘歸入樓流所管束不許散  
處滋事○二十五年奏准福建海口小船本澳  
採捕朝出晚歸者責澳甲稽查如有夜深不行  
歸澳許澳甲即行稟究違則治罪○三十年奏

准。沿海等省商漁船隻取具澳長族鄰保結報  
官准造。完日由官驗明給照係商船。於照內註  
明船主姓名年貌籍貫。兼註船工水手名數。仍  
於出洋時取具各船互結。由汎口驗照放行。係  
漁船。將船甲字號。於大小桅蓬及船旁大書深  
刻。照內止填註船主年貌籍貫。其船工水手名  
數。由汎口官隨時查註放行。地方員弁濫給匪  
人執照。及照內查填不實者。分別參處。○三十  
一年議准。五城所屬各村莊。照直省州縣之例。  
編連保甲。責成副指揮等。不時稽察。○三十三

年奏准。湖北鄖陽山地並陝西河南界連鄖陽各州縣所轄山地界址。設立保甲。稽查姦匪。四十二年奏准。滇省永昌之潞江順甯之緬甯二處。係通達各邊總匯。特派員弁專司稽查。遇有江楚客民。即驅令北回。其向來居住近邊之人。或耕或服。查明男婦戶口。照內地保甲例。編造冊檔。並嚴禁與附近擺夷結親。如有進關回籍等事。報官給票。關口驗明放行。回滇時仍驗票放出。若無印票。概不准藉詞出外。各員弁混放偷漏。查明參處。至沿邊各處本籍民人。保甲

亦應嚴為稽覈。毋許混匿江楚客民。查出從嚴懲治。○四十九年議准。各州縣編查保甲。即註明每戶口數。每年造冊送臬司查覈。至外來之雇工雜項人等。姓名籍貫。各臚列本戶之下。將來命盜案內。如有外來之人。即將清冊覈對。儻有疏漏。該臬司稟請督撫酌量指名參處。○嘉慶六年

諭各省設立保甲。以緝姦宄而靖地方。節經飭令各該督撫實力奉行。至京師為輦轂重地。五方雜處。尤易藏姦。自應加意整飭。以收實效。從前因京師廟宇。租

給客民居住。往往容留匪人。潛滋事端。曾經降旨。止許候補候選及引見官員指紳人等。查明來歷。暫為租住。其無藉之徒。毋得概行停留。並令步軍統領及各衙門。隨時稽察。年終彙報。嗣後務遵節次諭旨。實力稽察。○十五年

諭向例各州縣鄉鎮村莊。設立門牌保甲。俾其互相認識。稽察原所以詰姦宄而弭盜賊。而每歲編戶審丁。彙冊報部。遇水旱偏災。發帑賑恤。按冊而稽。自不至於浮冒。立法最為詳密。乃奉行既久。竟同具文。不但容留匪犯。無人舉發。致今日久潛匿。恣為不法。而

偶遇偏災散賑。則姦吏蠹胥浮開戶口。較歲報丁冊往往增多。任意作弊。殊屬不成事體。嗣後各省督撫於編設戶甲一事。務須飭屬實力舉行。俾姦匪不得潛藏。即申報晴雨。及約收實收分數等事。並與編審丁冊。認真稽察。則戶口多寡。年歲豐歉。隨時叢對。不致浮混。亦可杜捏災冒賑之弊。○十八年

諭現在京城內外。交順天府五城分別旗民。編查保甲。即刻奉行。若稍遲延。治罪不恕。並交步軍統領就所管地。面實力稽查。各該衙門務即實心經理。比戶嚴查。遇有蹤迹詭異者。即切實盤詰。俾姦宄無所容身。

以副除莠安良之治。其王公滿漢文武大臣官員第宅衆多。著並各自留心查察。凡給使人役內。如有來厯不明。形迹可疑者。立即送官究治。毋稍疏縱。○又

奉

旨。王貝勒等屬下屯居包衣人丁。即著該地方官一體編入保甲。就近管束。其八旗宗室覺羅等。在京外附近居住者。各有房產相依。著該州縣官一體編查。如有違犯法令情事。詳明該上司移咨在京該管衙門查辦。○二十年覆准。黔省編查保甲。各府廳州縣所管地方寨落內。如有盡屬苗人者。遵照舊章停

止編查。仍令該管土弁嚴行管束稽查。毋許容  
留匪類。將隨時查察緣由。按月具報查考。如盡  
係漢民。即飭令地方官遵照應行事宜。一體編  
查辦理。其漢苗雜處村寨。如漢民多於苗人。即  
由地方官歸於漢民冊內查辦。若苗人多於漢  
民。即由土弁歸於苗人冊內查報。○二十一年  
諭。現在各直省舉行保甲。覈對門牌。而責成不專。里長  
甲長等。恐不免有容隱之弊。著各省督撫再嚴飭地  
方官。於編查保甲時。責令里長甲長等。取具連名互  
保。甘結。如有來歷不明。蹤迹可疑者。該里長等畏其

株連。自不肯代為具結。立時首報。儻一經具結。其所保之人。或曾經作姦犯科。或竟係逆案逸犯。查出後。將出結之里長甲長。按律連坐。○道光十六年。

諭南苑地界違閭官房民居農戶村莊錯雜其間。人數衆多。良莠不一。必須嚴加查察。以杜姦萌。嗣後除八旗內務府上駟院慶豐司當差人役。由該管衙門督率稽覈外。著嚴飭各門章京三旗苑丞苑副等。無論旗民。逐一嚴行訪查。比戶曉諭。毋許容隱。分別功過。以示勸懲。並派內務府司官。不拘時日。前往各莊抽查。並取具查員切實甘結。至海戶並武甸等四處東

紅等三門內村莊居民佃戶八園草夫均係民籍人役除由該衙門出入稽察外著順天府督飭大宛二縣各按地界查明造冊按戶懸挂門牌一體編查保甲揀充里長保長隨時豫行照門進苑覆覈並將戶口清冊另造一分咨行該衙門以備互相稽查○三

十年十一月

諭近來各省盜賊橫行劫案纍纍甚至湖南會匪滋擾兩粵賊勢蔓延推原其故皆由保甲之法不行以致莠民無所忌憚本年春間曾經降旨通諭各直省督撫嚴飭該管州縣力復舊章實力辦理迄今已逾半

年。並未將現辦情形。據實覆奏。是直以通諭為虛文。  
視保甲為故事。無怪各省搶劫之案。層見疊出。毫無  
儆畏也。各督撫府尹身任疆圻。宜如何勤思緩輯。著  
即遵照前旨。各將地方現辦章程。據實具奏。州縣中  
認真奉行。著有成效者。即應加以鼓勵。其奉行不力。  
或虛詞欺飾。及藉端擾累者。亦即指名嚴參懲辦。以  
肅吏治而清盜源。毋得以空言覆奏。致良法美意徒  
成具文。○同治元年

諭。京師為輦轂重地。五方輻輳。良莠不齊。各城地面。必  
須嚴密稽查。方足以清姦宄。前經降旨。八旗地方。各

按界址由巡城御史與步軍統領衙門表裏稽查並令八旗滿洲蒙古漢軍都統各按本旗所屬地面認真查察數月以來仍未見大加整頓此等緊要公事日久尚未辦有端緒實屬翫悞著懷遵前旨實力辦理各該衙門堂官仍須互相糾察如有派委之員及地面官等奉行不力者即行從嚴參辦

流寓異地○順治十年題准凡外省流民附籍年久者與土著之民一例當差○十一年定新來者五年當差○康熙四年覆准罷職官員本身寄居各省者勒令回籍若本身既歿子孫有

田土丁糧已入版圖者回籍附籍聽其自便。○  
十年定各省貧民攜帶妻子入蜀開墾者准其  
入籍。○十一年議准直隸流寓人丁山西久流  
近流人丁改為實在人丁幼丁改為新編人丁。  
○二十六年題准凡身隸奉天府版籍應順天  
文武鄉試中式者即令於奉天所屬州縣居住。  
如有居住原籍並別省者該府尹查出送部褫  
革其入籍出仕之人解任後居住別省該撫查  
明題參仍令發奉天所屬地方居住如各省容  
留不行查出將地方官及該督撫一併處分。○

二十九年覆准川省民少而荒地多。有情願往  
川墾荒居住者。子孫即入籍考試。如中式後回  
籍。並往別省居住者禁止。○五十一年

諭武官駐紮地方。不許人民籍立產業。其已立產業者。  
令變賣回籍。若身歿後。有實不能遷移者。督撫覈明  
具題。○雍正元年覆准。提督總兵官副將等。均不許  
在現任地方。置立產業。即丁憂休致事故解退  
之後。亦不許在彼處入籍居住。此內或於任內  
置有產業。已經身故。及不能回籍者。該督撫詳  
晰具奏。請

旨定奪。參將以下等官。任所置有產業。或本身休致  
事故解退。已經身故。子孫留住任所。有欲在彼  
入籍者。皆許令該地方官報明督撫。即准其入  
籍居住。田土丁糧。與土著之民一例輸納。○乾  
隆二年覆准。武職緣事革職。果無原籍可歸。如  
任所地方。安葬祖父墳墓。其年已久。不得已欲  
在彼入籍者。副將以上等官。該督撫具奏。請  
旨定奪。參將遊擊都司。該督撫確查報部。兵部再咨  
詢該員原籍地方。如果無產業宗族。該原籍地  
方官。出具印結送部。即准其任所入籍。免回原

籍。如係假捏。希圖逗遛任所者。照例治罪。押回原籍。其不行詳查出結之地方官。照濫行出結例議處。守備以下革職微員。如本籍果無戶口墳墓。取結報部。聽其入籍當差。○四年覆准貧民入川墾地者。聽其散居各府州縣佃種傭工。為餬口之計。該督撫將姓名籍貫開造移詢各原籍。限文到三月內。備造清冊。回覆四川省。覈實稽察。其素非良善者。逐回。如實係安分貧民。無力佃種者。酌撥地畝。給予牛具籽種耕墾。分別水田旱地。及領墾年分。報部升科。自行傭工開

墾者聽其自便。情願回籍者。給予印票。仍令造冊存案。其散住各府州縣佃種者。責令佃主出結。貿易者市鄰出結。依附親故者。親故出結。寄宿寺廟者。留宿地主出結。仍與土著同編入保甲。互相覺察。如有生事可疑之人。許原出結人呈報。並許鄉保鄰佑人等首報。仍令該地方官不時稽察。如有失察者參處。○又覆准江南福建浙江各府州縣內搭棚山居。以種麻種靛煽鐵開鑪造紙作蓆等項。為資生之計者。其間土著甚多。亦有鄰省失業流寓之人。照保甲例。按

戶排入編甲。責成地主並保長。出具保結。呈送  
州縣官據冊稽察。儻居住星散。不論棚數多寡。  
自為一甲。互相稽查。內有已置產業。並願投認。  
絕戶丁糧入籍者。皆編入土著。同當差役。至有  
四五百戶以上者。該管官即於棚居鄉壯內。選  
立保長甲長。專司巡察。仍於農隙時逐棚查驗。  
不得藉端需索。其現在有願回籍者聽。仍將姓  
名開除。毋令復至。若招引匪類。潛匿編戶。地主  
保長不行首告者連坐。該管官以失察議處。○  
又覆准廣東州縣。有入山搭寮。取香木春粉砍

柴燒炭為業者。照保甲例編冊。每寨給牌一張。  
令寨人互相保結。擇老成謹慎者為寨長。寨戶  
聽其鈐束。遇有遷移及續入者。寨長及互結之  
人。將牌赴縣增除。儻窩藏姦宄。容隱不報者。發  
覺連坐。寨長照總甲容留棍徒例治罪。至凡業  
主招佃搭寮。必將寨丁報官。或係官山。前往搭  
寮墾種者。赴官報明查驗。違者照盜耕田畝律  
治罪。山主照違令律治罪。其墾種之地。以十年  
起科。即與為業。仍令州縣民壯。每月巡查。如有  
匪類在山出入。寨民能獲一名者。賞銀三兩。能

獲犯案之盜賊。每名賞銀二十兩。多獲者。按數  
加賞。文武官并不經心約束。以致窩匪者。照例  
議處。○又覆准。吉林等處有直省百姓情願入  
籍者。准其入籍。俱不得容匿逃人。重犯改換姓  
名。潛居其地。必行詢各原籍。咨覆到日。於戶口  
冊內。照奉天所屬民人。每名徵丁銀一錢五分。  
○五年議奏。寄居奉天府流民。設法行遣。陸續  
令回原籍奉

旨。情願入籍之民。准令取保入籍。其不情願入籍者。定  
限十年。令其陸續回籍。○八年奏准。山西陝西邊外

蒙古地方種地民人甚多。設立牌頭總甲。令其稽查。即於種地民人內。擇其誠實者。每堡設牌頭四名。總甲一名。如種地民人內。有於欠地租並犯偷竊等事。及來歷不明之人。即報明治罪。如通同徇隱。將該牌頭等一併治罪。○十年題准。粵省在臺灣人民。情願攜眷者。止許搬取妻子。令地方官取具鄰佑保結。照內填註名數。如地方官不查明。混行給照。照濫給印結。例議處本人嚴加治罪。○十二年題准。攜眷赴臺灣完聚者。地方官取具鄰佑保結。將搬取祖父母父

母妻室子女幾名口。填註照內。如乘機攜帶親族混行給照者。地方官照。濫給印票。例議處。本人嚴加治罪。其親族有暫時赴臺灣探視者。開明姓名年貌。呈本籍地方官註冊。仍填給印照。定期五月回內地銷照。若屆期有疾病事故淹留者。臺地印官於回籍文內聲明。凡州縣填照給文。密封交本人。齊投廈防臺防二廳。兩經拆驗。易文封照。交本人親投臺屬廳縣。驗明留照註冊。有人照不符者逐回。若由臺回籍。亦照此查驗。凡內外臺地。給照銷案緣由。月終通報督

撫稽察。歲終報部考覈。○十三年覆准山西陝西邊外設立總甲牌頭。令其專查不肖人等。如有犯罪逃往蒙古地方行竊並情有可疑之人。即稟明該管各官解回原籍。該管各官於每年春秋二季取具總甲牌頭等並無容隱甘結註冊。○十五年覆准奉天府流民歸籍一案。今已滿十年。其不願入籍而未經飭令回籍者。令地方官確查實數。速行辦理。此外有無游手無業未經驅逐之人。亦確查辦理。並令奉天沿海地方官多撥官兵稽查。不許內地流民再行偷越。

出口。並行山東江浙閩廣五省督撫嚴禁商船不得夾帶間人。再山海關喜峯口及九處邊門皆令守邊旗員沿邊州縣嚴行禁阻。庶此後流民出口可以杜絕。○二十六年覆准臺灣流寓民人搬眷過臺一年期滿。內外各地方官毋再濫行給照。有遇拏獲攬載偷渡船隻。將搭載大船及雇倩小船各船戶均照客頭包攬過臺之例治罪。仍嚴查前項船隻係何船戶連環互結並究明原報澳甲。及開張歇窩之人一體懲儆。船隻變價充公。其澳甲務選家道殷實小心誠

謹之人。取具族保鄰佑切結詳充。令其將客頭姓名籍貫。及寄居處所。開冊呈送地方官按名查拏。分別押送收管。其拏獲偷渡人犯。查明本籍解回。一名至十名。及十名以上者。將本籍地方官分別議處。並究明由何處出口入口。將失察之員。照議處本籍地方官例。查叅兵役治罪。至兵保渙甲。拏獲偷渡人犯。十名以上。同船戶客頭並獲者。每十名賞銀四兩。十名以上。照數遞加賞項。令地方官於偷渡船隻變價內支銷。○又奏准歸化城北大青山十五峪。民人三百

餘戶開墾地畝。邊界立牌。查明戶口註冊。不容多留一人。每年仍派出旗員。會同地方官。畫一巡查。○又議准。奉天流寓民人。於乾隆五年奉旨定限十年。無產業者。令其回籍。有產業者。令編入奉天民籍。又經奉

旨。展限十年。現在流寓小民。應入籍者。均皆歡悅入籍。應回籍者。俱經各回原籍。所有商賈工匠及單身傭工三項。為旗民所資藉者。准其居住。其餘入籍之戶。與奉天民人一體納賦。仍令直隸山東等省督撫轉飭邊關海口。嗣後赴奉天民人。

內查係並無貿易。又無營運者。嚴行查禁。○二十七年覆准。甯古塔交納地丁錢糧之開檔家奴。及官莊年滿除入民籍人等。俱係世守居住。置立產業。不能遷移。伊等地畝。概行查出。即令納糧。至甯古塔界內。地方褊小。外來流民不便。准其入籍。應將流民驅回。如有願於吉林伯都訥地方入籍者。即將該處丈出餘地。分給伊等。交納地糧。伊等在甯古塔所墾之地。交甯古塔納糧。民人納糧。其吉林伯都訥地方墾地流民。如有願納糧者。將伊等地畝花名入冊。交納錢。

糧。願回籍者將地畝交與現納糧民人並附近  
民人納糧。仍令嗣後嚴禁私墾。並令邊門官員  
實力查逐。儻復有流民潛入境地者。嚴叅議處。  
○二十八年議准江西安徽浙江等省棚民除  
有室家者隸籍編入保甲外。其餘單身貧窶之  
人。令於原籍州縣領給印票。並有認識親族保  
領。方准租種安插。儻有轉相頂替。及來歷不明  
之人。責重保人。互相糾察。舉報究治。至現在單  
身棚民已經種地者。責成有家棚民取具切實  
保狀。如無人保結者。即令押回原籍。○三十四

年復准阿勒楚喀拉林地方流民二百四十二戶俱係陸續存住。在二十七年定議之前定限一年盡行驅逐至伯都訥地方每戶撥給空甸一具令其入籍墾種二年後納糧。○五十五年覆准粵東雷廉二府交界海面之灘洲及迤東之斜陽地方俱係孤嶼荒地貧民搭寮居住日聚日多不免與洋盜串通滋事飭地方官逐一遞回原籍安置並將寮房概行燒毀此外廣州等八府屬海島貧民聚處有年儼同村落戶口多寡不同良莠亦復各異若概行驅逐未免失

業無依。將散處外洋。離汎較遠之校椅灣等三十二處。搭蓋寮房一百五十八間。共一百六十二戶。現有寮房。概行拆毀。並詢明各戶本籍住址。撫恤安插。其附近礮臺塘汎之海南柵等八十三處。共一萬六千七百三十一戶。久成村市。並設有澳長稽查。向無窩匪盜竊之事。免其拆毀。就地編排保甲。申敘條款。出示曉諭。此後毋許續行占住。以免良莠混雜。該管營縣按月親赴點查。年底道府通報。現經拆毀向無寮房各島。即專責營員隨時查勘。統於年終彙報具奏。

如有虛應故事。捏飾空隱。嚴參究處。○又

諭。前因沿海各省所屬島嶼。多有內地民人。建蓋草寮。房屋居住。日聚日多。誠恐相聚為匪。查察難周。令各該督撫查明海島情形。如有匪徒潛搭草寮。房屋居住者。立即燒毀。今沿海民人居住海島。久已安居樂業。若遽飭令遷移。使濱海數十萬生民失其故業。情殊可憫。且恐地方官辦理不善。張皇滋擾。轉致漂流為匪。亦非善策。所有各省海島。除例應封禁者。久已遵行外。其餘均著仍舊居住。免其驅逐。至零星散處人戶。僻處海隅。地方官來必能逐一查察。所云燒毀。

寮房移徙人口亦屬有名無實。今各島聚落較多者。已免驅逐。此等零星小戶皆係貧民亦不忍獨令向隅。而漁戶出洋採捕暫在海島搭寮棲止更不便概行禁絕。且人戶既少稽察無難尤非煙戶稠密之區易於藏姦者可比。自應聽其居住毋庸焚毀。所有沿海各省地方均著照舊辦理。惟在各該督撫嚴飭沿海文武員弁實力稽察編立保甲如有盜匪混入及窩藏為匪者一經查出即將該犯所居寮房概行燒毀俾知儆懼。其漁船出入口岸務期取結給照登記姓名。僥幸船進口時藏有貨物形迹可疑即當嚴行

盤詰無難立時拏獲地方官果能實力奉行認真稽查盜風自可永戢原不在多設條款競為無益之空言也。○五十八年奏准山東蓬萊等十一州縣海島六十一處現在並無新建房屋居住之人其長山島等三十三處共有居民三千二百八十九戶男女大小二萬三千九十名口一律編查令沿海員弁實力巡查以靖海疆。○又

諭前因海島居民日衆令各督撫編查戶口今山東一省海島居民即有二萬餘名口各省海島居住者想亦不少此等居民相沿居住為日既久人數又多勢

難概令遷徙。惟當遵照前旨。不准添建房屋。以數日聚日衆。所有現住人民。仍應留心訪察。嚴密稽查。毋任勾結匪徒。滋生事端。該督撫等總當實力奉行。

五十九年覆准浙江嘉興。甯波。台州。溫州。四府並玉環廳所轄各島。共計五百六十一處。向有居民。准其居住者一百十有七處。原應封禁。應行驅逐者十一處。內除甯海縣所轄之南田山等四處。業經遷徙外。其餘太平。樂清二縣所轄之柳機山等七處。海島居民居住年久。概行驅逐。不免流離失所。准其照舊居住。毋許再行私

添偷住。並無居民。海島共四百六處。內玉環廳所轄之石板灘等三處。俱係安分種作。免其驅逐。仍令一律編甲稽查。毋許再有增添。其漁汎時暫行搭寮二十七處。事畢即令拆逐。毋使稍有容留。於年終查明有無增添。彙摺具奏。其戶口細冊印結。一併隨奏送部查覈。○嘉慶三年。覆准黔省苗疆毗連川楚滇粵。其間苗民往來。原難禁絕。今漢苗所居各有村寨。原分界限。因苗人不能出外貿易。亦資客民趕場互市。以通有無。但恐無藉游民。潛往煽惑。愚弄滋事。嗣後

令貿易客民止准居住民村不得住宿苗寨其  
地方官旬攝公事責令苗弁傳喚毋許差役前  
往滋擾通飭各屬實力奉行儻有陽奉陰違查  
出嚴參究治○五年議准郭爾羅斯地方流寓  
內地民人二千三百三十戶均係節年租地墾  
種難以驅逐應劃清地界自本旗游牧之東穆  
什河西至巴延吉魯克山二百三十里自吉林  
伊通邊門北至吉住窩鋪一百八十里定為規  
制不准再有民人增居每年令吉林將軍造具  
戶口花名細冊送部備查仍設立通判巡檢各

一員彈壓專理詞訟。○十五年

諭本日朕恭閱

世宗憲皇帝實錄內載雍正五年二月二十三日

諭旨。敬覽。

聖祖仁皇帝實錄內載康熙五十一年奉

旨。山東民人出口種地者多至十萬有餘。伊等皆朕黎庶。既到口外種地生理。若不容留。令伊等何往。但不互相對聞查明。將來俱為蒙古矣。嗣後山東民人有到口外種地者。該督撫查明年貌籍貫。造冊移送稽查。由口外回山東去者。亦查明造冊。移送該撫覆覈。

稽查等因。此事今尚行否。其直隸山西民人有往口外種地者。亦照此例行否。著大學士等查奏等因。欽此。嗣經廷臣查奏。以口外種地民人。於雍正元年二年三年。陸續設古北口。張家口。歸化城三同知管理。但地方遼闊。各該同知所轄。恐有遺漏。應令直隸山西督撫查明。酌量分交管理。並飭三路同知。各按所管地方。將寄居民人。與種地民人。查明姓名籍貫。造冊。咨查各本籍。仍令各省州縣。將所有出口種地民人。記檔。以備日後查對。嗣後再有出口種地之人。俱著該同知一面安插。一面移咨本籍。查無過犯迷遁。

等情。准其居住耕種。年終造冊報部等語。當蒙  
允准施行。因恩口外各蒙古部落種地民人。在

聖祖仁皇帝

世宗憲皇帝時。已因人數繁多。屢經

降旨設官管理。立法稽查。迄今又將及百年。內地民人  
生齒日繁。出口謀生者益復加增。即原先出口之人。  
亦復滋息日多。其自雍正年間添設同知以後。現又  
增設官若干員。各寄居種地民人。現在作何稽查。遇  
有民人出口者。各該地方是否記檔。該口外官員等。  
是否將有無過犯等情。咨查本籍。再行安插。年終是

否。造冊報部。著該部查明覆奏。欽此。遵。

自議奏。向來各關出入人等。係按名驗票。審對籍貫。註冊放行。將人數花名造冊送部。又兵部例載。民人出入關口耕種傭工者。呈明該州縣。每年給予印票一次。將年貌姓名。覈交該口官弁。年貌姓名相符。准其出入。該州縣將給過印票。守口官將放過人數。於年底彙造清冊。報部查覈。又嘉慶八年經兵部酌議。出口民人。凡隻身前往。無論貿易。僕工就食。窮民皆令呈明地方官給票。各關口查驗放行。原票令該縣民人自持。以

憑進關時查照。所有放過票張。仍令造冊報部。守口員弁。將驗票放行者。照例造冊報部。仍將並無放過無票民人之處。按季加結呈報查覈。奏准通行在案。古北口。張家口。歸化城。自雍正年間。設立三同知管理以後。據吏部查覆。移萬全縣縣丞一缺。駐張家口。古北口。添設巡檢一員。歸化城添設通判四員。巡檢一員。歸化城。種地民人。由該同知通判各按所管地界。照編造保甲之例。每年將舊存人數若干。新到人數若干。回籍病故人數若干。均註明係何州縣民人。

道冊咨部查叢古北口以外。灤平豐甯二縣向  
係土著民人。按冊輸糧。熱河邊北一帶。係蒙古  
外藩游牧處所。自乾隆四十三年改設州縣以  
後。民人集聚漸多。山廠平原。盡行開墾。均向蒙  
古輸租。有家資稍裕。搬移眷屬者。亦有偶值歉  
收。投親覓食者。張家口地方偏僻。關外東口兩  
溝。雖有山坡墾種地畝無多。數十里外。即係游  
牧草地。並無可墾。亦無村落。其商販往來。俱由  
都統衙門給予照票。其餘隻身出入民人。亦俱  
取具關內鋪戶保狀。方准放行。○十六年

諭戶部議覆吉林將軍寡冲阿查泰伯都訥流民納丁入冊一摺已依議行矣其摺內稱嗣後令該將軍嚴飭各邊門關隘實力查禁並飭該管官申明保甲之法毋再容留滋弊端語内地流民出口私墾本干例禁造人數衆多難以驅逐間數年查辦仍懇請編丁入戶不過以此後申嚴例禁令不得再有私墾為辦該將軍等亦視同具文並不實力查禁殊非清源節流之道著通諭直隸山東山西各督撫轉飭各關隘及登萊沿海一帶地方嗣後内地民人有私行出口者各關門務遵照定例實力查禁若有官吏互相容

隱私行縱放。一經查出。即據實參處。如此各省關禁。一律申明。使出口之人漸少。則私墾之弊。當不禁而自除。該將軍仍督令該管官隨時嚴查保甲。互相稽考。俾各專責成。毋致日久生懈。○十八年議准吉林伊通河地方居民男女大小戶口。設立門牌。按戶書寫開列懸之門內。每年將應增應減民數。責令該屯鄉地牌頭報明同知更換。該界巡檢屆時稽察。如有詭冒情弊。將該戶民分別辦理外。仍將該屯鄉地牌頭一併嚴處。以示懲儆。該同知應隨時抽查。毋任蒙混。並令編造丁冊。以

便與門牌隨時覈對。均於年底歸入民數案內。  
咨部考覈。二十年覆准。浙江省棚民覈其租  
種。已逾二十年。現有田產廬墓。娶有妻室者。即  
准令人籍。其年分未久。業已置產締姻者。俟扣  
滿年限。亦准其呈明入籍。若並未置產締姻。租  
種山場。尚未年滿。及租票內並未註有年分者。  
應暫為安插。年分未滿者。俟年滿飭退。未註年  
分者。酌定五年飭退。俱不准再種苞蘆。致礙農  
田水利。仍一體編查。另造一冊。按棚民三十戶。  
設立棚長一名。稽查約束。儻棚民中有為匪不

法情事。責成棚長舉報。地方官究辦。棚長容隱。一併究懲。其隻身棚民。租種年限已滿。及本無租山資本。藉稱傭工。在山逗遛者。均驅逐回籍。自此次清釐後。不准再有增添。如本地民人。將公共山場。不告知合業之人。私招異籍民人。搭棚開墾者。招租之人。照子孫益費祀產例。承租之人。照強占官民山場律。分別治罪。編查保甲時。一體編查。每屆十月。將棚民另立一冊。隨同附送。儻有編查不實。草率遲延。分別參處。○道

光八年

諭蘇成額奏清查各屬種山游民一摺。茲據奏酌定規  
條。嚴飭各府廳州縣及苗疆土司。將現在種山客民。  
逐細清查。除來歷不明形迹可疑者。即行遞籍管束  
外。其餘概令詳載戶口姓名年貌籍貫。各舉誠實之  
人。作為客長。令其約束。一體編入保甲冊內。由地方  
官隨時稽察。毋許滋事。其有退佃回籍者。所蓋蓬房  
無人居住。立即拆毀。仍嚴禁書差藉端需索。及里保  
私租官地。以杜弊端。○二十三年奏准。安徽徽州甯  
國池州滁州廣德等州所屬。山多閒曠。間有浙  
江溫台等處民人搭棚棲止。該棚民等生齒日

繁兼有無業之民。逗遛溷迹。委員編設棚頭。發給門牌。除歷年已久。確有冊籍可憑者。免其驅逐外。其新添之戶。一概逐令回籍。○同治五年奏准。江蘇銅沛兩縣。自黃河退涸變為荒田。山東曹濟等屬。各縣客民。陸續前往創立湖園。相率墾種。銅沛土民。於水退歸鄉後。因舊產被客民占墾。日相控讐。釁釀巨案。現經查明上年客留捻匪之刁王。兩團客民。駛回原籍。其餘安分各良園。即令其各安生業。嗣後該地方官遇有土客控案。但當分別良莠。不得復存土客之見。

以期永息爭端。

改正戶籍。雍正元年議准山西等省有樂戶一項。原屬忠義之後。其先世因明建文末不附篡立被害。遂遭荼辱。編為樂籍。世世子孫不得自拔為良民。飭令各屬嚴行禁革。令其改業得為良民。○又覆准浙江紹興府屬之惰民賤辱已極。實與樂籍無異。行令削除其籍。俾改業自新。與編民同列。○五年。

諭近聞江南徽州府則有伴檔。甯國府則有世僕。本地呼為細民。幾與樂戶情民相同。又其甚者如二姓丁

戶村莊相等。而此姓乃係彼姓伴檔世僕。凡彼姓有  
婚喪之事。此姓即往服役。稍有不合。加以箠楚。及訊  
其僕役起自何時。則皆茫然無考。非有上下之分。不  
遇相沿惡習耳。應予開豁為良。俾得奮興向上。免至  
汚穢終身。累及後裔。欽此遵

旨議准。嗣後紳衿之家。典買奴僕。有文契可考。未經贖  
身者。本身及其子孫。俱聽從伊主役使。即使贖  
身。本身及在主家所生子孫。仍應存立僕名分。  
其不在主家所生者。仍照旗人開戶之例。豁免  
為良。至年代久遠。文契無存。不受主家奉養者。

概不得以世僕名之。永行嚴禁。○七年

諭粵東地方四民之外別有一種名曰蜑戶即猺蠻之類以船為家捕魚為業通省河路均有蜑船生齒繁多不可數計粵民視蜑戶為卑賤之流不容登岸居住。蜑戶亦不敢與平民抗衡畏威隱忍跼蹐舟中終身不得安居之樂深可憫惻。蜑戶本屬良民無可輕賤摘棄之理且彼輸納魚課與民相同安得因地方積習強為區別遂令飄蕩靡寧著該督撫等轉飭有司通行曉諭凡無力之蜑戶聽其住船自便不必強令登岸如有力能建造房屋及搭棚棲身者准其在

於近水村莊居住。與齊民一同編列甲戶。以便稽查勢豪土棍。不得藉端欺凌驅逐。並令有司勸令墾戶。開墾荒地。播種力田。共為務本之人。以副朕一視同仁之至意。○八年覆准江南蘇州府屬之常熟昭文二縣丐戶。與浙江情民無異。族居沿海。久陷沈淪。嗣後削除丐籍。同列編氓。○乾隆三十六年覆准。山陝等省樂戶丐戶。原係改業為良。報官存案。如果祓濯舊污。間時久遠。為里黨所共知者。自不便阻其嚮上之路。即以報官改業之人為始。下逮四世。本族親支。皆係清白自守。方准。

報捐應試。該管州縣取具親黨里鄰甘結聽其  
自便。不許無賴之徒藉端攻訐。若係本身脫籍  
或僅一二世。及親伯叔姑姊尚習猥業者。一概  
不許濫廁士類。徵幸出身至廣東之蜑戶。浙江  
之九姓漁戶。及各省凡有似此者。悉令該地方  
官照此辦理。但此等甫經改業之戶。不准遽行  
報捐應試。至於耕讀工商業已為良。悉從其便。  
如有勢豪土棍。藉端欺壓訛詐者。該地方官仍  
嚴行查禁。○嘉慶十四年

身賣身文契。率稱遺失無存。其服役出戶年分。無從指實。遇有捐監應考等事。則以分別良賤為辭。疊行許控。而被控之家。戶族蕃衍。不肯悉甘汙賤。案牘繁滋。互相仇恨。所有該處世僕名分。統以現在是否服役為斷。若遠年文契無可考據。並非現在服役奉養者。雖曾葬田主之山。佃田主之田。著一體開豁為良。以清流品。

番民歸化。○凡番民歸化。彙入版圖者。令專管官編立保甲。查緝匪類。逢望日宣講

上諭。以興禮讓。○雍正十二年

諭聞四川重慶府地方。昔年有成都府屬咸茂等處蠻民。每於冬初來此傭工。春暖始歸。歲以為常。近來有姦蠻等自號大小頭目。各攜婦女千百成羣。前來重慶對岸搭房居住為倡。流棍姦匪亦皆混迹其中。甚有關於地方風俗。朕思此等姦蠻。自應嚴行驅逐。免致滋事。但咸遠等處回民多藉傭工度日。若因此概行禁止。不令出境。恐失其生理。又非情法之平。著傳諭該撫轉飭地方官。實力稽查。除實係傭工力作之人。仍聽其往來居住外。若攜帶不良蠻婦。有關地方風化者。即行逐回。交該管官約束。不許出境。將流棍

等一併懲治。○十三年題准福建臺灣府屬彰化縣

生番一百九十九名。彙入彰化縣版籍。歲貢鹿皮折銀二兩四錢。

○又題准廣西慶遠府屬之宜山縣彙入秦銷。

龍門司接界索潭等六村歸流土民一百七十

九口歸入宜山縣版籍熟田七十四畝。額徵銀二兩六錢

錢二分二毫遇閏徵銀二兩七錢九分七釐有奇升科徵本色米三石一斗六升七合二勺有

歸入宜山縣管轄。造入地丁奏銷。○乾隆三年

題准臺灣府屬合番社向化生番男婦二百八

十五名附入臺屬版圖。歲貢鹿皮各一張。史傳充餉。○三十

二年奏准臺灣屋鳌末毒獅子等一十三社雖

俱係內山生番。但向屬安分。今見攸武乃社。兜  
番被勦。官兵路過。秋毫無犯。衆番社畏威懷德。  
俱願輸誠歸化。每年獻納鹿皮四張。小米四石。  
○五十三年議准。四川梁黃大定白鹿白雞勒  
折虎落多押竹。昔日壩等八寨生番。於康熙二  
十四年投誠。各有頭人。未隸文武管轄。嗣康熙  
五十七年。經該處土司引赴豐溪營當差。該營  
即令沙壩土司經營。後因土司不能撫輯。番民  
不受管束。凡遇辦理軍需夷務。雇用夫馬。均由  
茂州調派。俱遵奉無誤。並經捐輸社穀存倉。且

該番民等投誠以來。已踰百年。衣冠言語悉與  
該州民人無異。近來亦有請書應考之人。呈想  
歸入茂州民籍。隨行取該土司願聽歸州管轄。  
遵依准其將梁黃等八寨番民編入茂州八里  
民人帳戶。一體當差以勵番夷慕義嚮化之誠。  
至沙壩土司原管十寨。今除梁黃等八寨歸入  
茂州管理外。尚有沙壩舊瓜老二寨。原係該土  
司親族等住牧。仍聽該土司管轄○嘉慶十六

年

諭豐仲常明奏。嶺夷向化情願改土歸流一摺。據稱該

夷人約列等。以川省所轄各路土司向有改土歸流之例。情願一心向化。永作盛世良民。並請升科納糧。更名易姓。一體當差等語。該夷人僻處窮邊。不通聲教。自歸服以來。業經數載。漸通內地語言。畏法奉公。飲和食德。今具詞環籲輸忱內附。願列齊民。著加恩准。其改土歸流。以遂其誠。慕義之懷。所有戶口冊籍。及升科糧數。著該督叢明分別題咨辦理。○道光六年議准。瑪瑙蘭歸化社番。留給餘埔三十餘里。以資生計。裁樹為界。毋許漢人侵越。如情願。賙給漢人耕佃取租。聽其自便。每屆三十年清。

釐一次。如有姦民欺佔。或瞞耕之後。久假不歸。  
地方官隨時懲辦。○光緒十二年。招撫臺灣生  
番四百餘社。歸化七萬餘人。○又臺灣中路所  
蘇魯等七社。北路白阿歪等處生番二十社。一  
律歸化。

安集流民。○順治十一年。獲准各旗及富戶有  
能捐資安插窮丁者。報部題請敘錄。○十二年  
獲准。州縣官安插流民千名至五千名者。准予  
紀錄。督撫總計通省名數議敘。○康熙五年題  
准。地方官招集流民萬名者。紀錄一次。○七年

覆准現任文武大小各官。有能捐資遷移四川流民歸籍。每百家以上者。紀錄一次。四百家以上者加一級。五百家以上者加二級。六百家以上者加三級。七百家以上者不論俸滿即升。招回之民責令地方官安插。○乾隆元年覆准。蒙古人流移口外大通地方者。稽查明白。分析安插。係有原管之札薩克者。仍交與收管。其別無管轄者。交附近各部落安插。將戶口細冊送理藩院。其立有產業者。地方官估值。動支公項銀。按數給予。俾赴安插處所。別立產業。其原立產

業交地方官經營。如有民人情願承業者。照數定價歸項。令其執業。其無產業者。大口賞羊六隻。小口賞羊四隻。酌量交附近各部落分別安插。自清釐安插之後。如有容留外來蒙古。將容留人治罪。失察官叅處。○三年題准。閩人往番年久。准其攜帶妻子回籍。如本身已故。所遺妻子等。許其在番親戚故舊帶回。若無親故。許將故父鄉貫族屬。並隨帶人口書單。交給船戶齊回。入口報明汎弁。轉報地方文武官。按單點驗。將單轉發本籍。令族屬保領。如無保領及姓名。

互異。即行完治。其所帶回妻妾。不許別嫁。以杜  
拐販。○五十七年

諭直隸省今年京南各屬被旱較廣地方官散賑恐有  
未周若不設法辦理則京城熱河就食者日聚日衆  
古語救荒無善策現詢據熱河道府等稱熱河領賑  
貧民有每日赴廠食粥者有領過一二次不復再來  
者該道府訪詢情形此等領賑貧民並非俱藉粥賑  
度活其稍有力者即分赴他處手藝傭工各自謀生  
等語可見領賑貧民內稍資接濟原即有可以自謀  
生計之人並非一律嗷嗷待哺專資粥賑度日除已

令熱河道府就近曉諭各貧民由張三營博洛河屯等處分往各蒙古地方謀食者不禁其京南地方亦應一體妥辦著梁肯堂即轉飭各州縣於赴京出口通衢令各地方官遇有貧民詳細曉諭今年關東盛京及土默特喀爾沁教漢巴溝三座塔一帶均屬豐收爾等何不各赴豐稔地方傭工覓食俟本處麥收有望即可速回鄉里如此徧行曉諭並令其或出山海關赴盛京一帶或出張家口喜峯口赴巴溝三座塔暨蒙古地方不必專由古北口出口則貧民中稍可力圖自給者知有長遠覓食之路自必分投謀生

不至齋赴粥廠致滋擁擠人多致病庶更妥協但總須善為開導不可加之攔阻此事該督既貽誤於前再不實力稽查任令地方官吏剋扣浮冒其咎已不止於革職留任若復將赴賑貧民阻其生路則其咎更重斷不能稍為寬貸也○嘉慶六年

諭

京城一帶雨水連綿永定河漫河泛溢被災貧民口食無資流離失所節次特派大臣等查災給賑一切加惠窮黎之事雖已次第舉行而朕心軫念民艱寢食不安宵旰焦勞無時或釋近日近畿災民紛紛至京竟有被各門攔截者更屬大謬現在五城設立飯

廠窮民等自必聞風踵至。豈可轉行阻禁。況此等被災難民。皆由本處無可逃生。是以遠赴京師就食。朕念切恫瘡。無論遠近災黎。寧忍稍分畛域。前已降旨令直隸地方官分段設廠煮賑。伊等知本處可以就近得食。亦必漸歸鄉里。又何忍驅逐禁止乎。總之多救一民。減朕一分之罪。惟在辦賑各員等。仰體朕子惠元元。如傷在抱。至意實力妥辦。毋使一夫失所。方足以拯流離而挽天心。

買賣人口。○雍正四年議准。漢人家生奴僕。印契所買奴僕。並雍正五年以前白契所買。及投

靠養育年久。或婢女招配已生子者。男屬世僕。  
永遠服役。其女婚配。悉由家主。仍造清冊呈明。  
地方官存案。凡漢人買僕。及婢女招配。並投靠  
之人。均書明文契。呈地方官鈐印。如有事犯。驗  
明報官冊及印契。照例治罪。